

## Sar ačhil'om spisovat'el'kake

Sar somas cikñi čhajori, igen kamavas o gende. Sar sikh'l'il'om te genel akorestar ča furt genavas. Genavas gadžikane paramisa predal cikne čhavore, pal'is vaš o phureder. Na džanavas, hoj o gende šaj hine irimen the romanes.

Jekhvar sar imar somas bari, ta džavas andre but'i u dikhl'om andro „stankos“, kaj bikenenas o thuvale the o žurnala, romano žurnalos *Amaro lav*. Sar vaše počinavas ta mange izdranas o vasta. Na paťavas. Imar pal o drom andre but'i les genavas. Has odoj romañi poezia, o lavora the has igen šukar. Akor šaj has o berš 1991. Pal'is mange les cinkeravas sako čhon. Sikavavas les andre but'i le gadženke, la dake, bo phiravas laha andre but'i. E daj na džanel te genel, ta me lake le žurnalistar genavas. Jekhvar odoj bičhad'om ajso cikno tekstos, te oda akana genav, ta olestar asav. Vareso ajso: „Romale čhavale, na mukhen le dajen korkore.“

Akorestar pregejl'a imar but pañi. Pal'is gejl'om andro berš 1998 Prahate te kerel konkurzos pro medialno kurzos, oda akor kerelas e organizacija Dženo, andre savi has o šeralo o Ivan Veselý. Odoj prind'ard'om buter manušen, save kerenas andro media. Phiravas pro žurnalisticko kurzos the odoj kamenas, te irinas varesave paramisa. Irind'om akor jekh paramisa Pal o duj mačkici, the mek varesave aver. Chudl'om tiš te thovel o gadžikane teksti andre romañi čhib. Oda keravas andro žurnalis *Romano Vod'i*. O žurnalis *Amaro lav* imar na has.

Varekana mandar mangelas the miro romano tekstos. Na džanavas pal soste te irinel. Baril'om paš miri baba the o papus. Irinavas pal lende, bo len igen bares kamavas. Akorestar chudl'om te irinel buter, bo mange o irišagos hin but pre dzeka. Akana oda hin miro hobi. Šaj bisterav pre sakod'iveseskere nalačhibena.

Te genav romano tekstos, ta som avka lošal'i, sar oda peršo d'ives, sar džavas andre but'i the dikhl'om romanes irimen o žurnalis.